



বেছে নিতে হয় একটি বিশেষ কালপর্বকে। কিন্তু এই কালপর্ব নির্বাচনের ক্ষেত্রেও একটি বিমূর্তায়ন প্রক্রিয়া ক্রিয়াশীল থাকে। শূন্যতে আমরা ইতিহাস সম্পর্কে একটি সাধারণ বা বিশেষ ধারণা দাঁড় করাই। তারপর সেই নকশাকে ঐতিহাসিক ঘটনা-পঞ্জীর ওপর চাপিয়ে দিই। এক্ষেত্রে আবার পশ্চিমী কালানুক্রমের ধারণাকেই আমরা কম/বেশি অনুসরণ করে চলেছি। ইংরেজ আমলে ঔপনিবেশিক ইতিহাসতত্ত্বে শাসকদের ধর্ম অনুসারে ভারতবর্ষের ইতিহাস বিভক্ত হয়েছিল তিনটি যুগে : হিন্দু যুগ, মুসলমান যুগ এবং ব্রিটিশ যুগ। ভারতবর্ষ স্বাধীন হবার পরেও এই ধর্মভিত্তিক পর্ববিভাজন নাম পাণ্ডে থেকে গেল। এক্ষেত্রেও ইতিহাসের প্রাচীন, মধ্য ও আধুনিক যুগ সংক্রান্ত পাশ্চাত্য ধারণাগুলিকেই আমরা গ্রহণ করেছি, যদিও পাশ্চাত্য পর্ববিভাজন তথা পাশ্চাত্য সমাজ-বাস্তব কোনামতেই আমাদের দেশীয় সমাজ-বাস্তবের সঙ্গে মেলে না। অধুনা যখন 'আধুনিকতা'র সংজ্ঞাটির সর্বজনীন গ্রহণযোগ্যতা নিয়েই নানান প্রশ্ন উত্থাপিত হচ্ছে, তখন এই আধুনিকতায় উত্তরণ অগ্রগমন না পশ্চাদ্গমন তাও ভেবে দেখা দরকার।

অন্য একটি প্রবণতা হল বিষয়-কেন্দ্রিক ইতিহাস আলোচনা— অর্থাৎ অর্থনৈতিক ইতিহাস, রাজনৈতিক ইতিহাস, সামাজিক ইতিহাস বা সাংস্কৃতিক ইতিহাস প্রভৃতি এক একটি বিশেষ বিষয়কে কেন্দ্র করে রচিত ইতিহাস। এক্ষেত্রেও আবার মানুষকে একমাত্রিক জীব হিসেবে ধরে নিয়ে আলোচনা আরম্ভ করা হয়। হয় সে অর্থনৈতিক প্রাণী, নয় সে সামাজিক প্রাণী। মানুষের সামগ্রিক অস্তিত্বকে এক বিমূর্তায়নের প্রক্রিয়ায় ছোট ছোট খণ্ডে ভেঙে ফেলা হয়।

কিন্তু মানুষ তো বিচিত্র প্রাণী। তার বাঁচার নানান মাত্রা। আজ পর্যন্ত পাশ্চাত্য ইতিহাসবিদ্যার প্রভাবে যুক্তিবাদ তথা জ্ঞানদীপ্ত-শিল্পায়ন-আধুনিকতার সর্বজনীন মাপকাঠিতে সারা পৃথিবীর ইতিহাসকে বিমূর্ত ছকে ব্যাখ্যা করার প্রবণতা চলে আসছে। ইতিহাস অনন্ত প্রগতির ইতিহাস— তা যেন এক একমাত্রিক সরলরেখার বিবর্তনমাত্র। মাঝে মাঝে পাশ্চাত্য ইতিহাসের চৌহদ্দির মধ্যেই এমন কতকগুলো ঘটনা ঘটেছিল যা এই প্রগতির ধারণার পক্ষে অন্তরায়— যেমন সাম্রাজ্যবাদ : প্রথম বিশ্বযুদ্ধ, নাৎসীবাদের উত্থান এবং দ্বিতীয় বিশ্বযুদ্ধ এবং শেষত যুদ্ধোত্তর ঠাণ্ডালড়াই। কিন্তু উপরোক্ত ঘটনাপ্রবাহের বিকৃতিকে সাময়িক দুটি বলে পাশ কাটিয়ে একদিকে কম্যুনিষ্ট বিপ্লবগুলি এবং অন্যদিকে আন্তর্জাতিক জনকল্যাণ-মূলক কার্যবলীকে প্রগতির পথে যাত্রা বলে মনে করা হয়েছিল। আর এশিয়া ও আফ্রিকার উন্নতিশীল দেশগুলির ইতিহাস রয়ে গেল মূলে চৌহদ্দির বাইরে। সেই দেশগুলির ইতিহাস হল পাশ্চাত্য প্রগতির বিকৃত বা পিছিয়ে-পড়া রূপ। পাশ্চাত্য সভ্যতার বাইরের যে-কোনও সভ্যতাই হল নৃতত্ত্বের বিষয়। পাশ্চাত্য : বিষয়ী, প্রাচ্য : বিষয় — পাশ্চাত্য : আত্ম, প্রাচ্য : পর।

একবিংশ শতকের সন্ধিক্ষণে ইতিহাসের এই সর্বজনীন কাঠামোকে নানান ধরনের

সমালোচনা ও আক্রমণের সম্মুখীন হতে হয়েছে। ফলে বিভিন্ন সমালোচনার দিক থেকে ইতিহাসচর্চার কতকগুলি বিকল্প রূপও ক্রমে শক্তিশালী হয়ে উঠেছে।

লুসিয়েন ফেব্র (Lucien Febvre : 1878-1956) এবং মার্ক ব্লখ (Marc Bloch : 1886-1944) মানুুষের সামাজিক অস্তিত্বের বিচিত্ররূপকে প্রথম ধরতে চাইলেন ইতিহাসের সীমায়। ভূগোল ও সামাজিক মনস্তত্ত্বের দিক থেকে তাঁরা ইতিহাসের ব্যাপকতর বিশ্লেষণ করতে অগ্রসর হলেন। তাঁরা সাহায্য নিলেন জ্ঞানতত্ত্বের বহু বিচিত্র শাখার গবেষক ও তাঁদের উত্তরসূরী ফার্নান্দ ব্রদেল-এর (Fernand Braudel : 1902-83)। সামাজিক কাঠামোকে একদিকে কালের দীর্ঘস্থায়ী বা চিরন্তন এককে এবং অন্যদিকে তার দ্রুতগতিসম্পন্ন একক ও সেই এককের পরিবর্তমানতাকে নিয়ে আলোচনা করেছেন এঁরা।

পাশ্চাত্য জ্ঞানতত্ত্বের ইতিহাসের গভেই জ্ঞানদীপ্তির যে সমালোচনা নিহিত ছিল, তা আজকের দৃষ্টিভঙ্গিতে তাৎপর্যপূর্ণ হয়ে উঠেছে। যে নীটৎসে-কে (Nitzsche, Karl Wilhelm : 1818-80) একদিন ফ্যাসিবাদের বৌদ্ধিক জন্মদাতা বলে অভিযোগ উঠেছিল তাঁকেই এখন গভীরতর চর্চার বিষয় বলে ভাবা হচ্ছে। যুক্তির গঠিত যাত্রাপথই নয়। অযুক্তির পথও একটা পথ। এই বিকল্প গমন ধরেও অনুসন্ধান শুরুর হয়েছে। জ্ঞানতত্ত্বকে ক্ষমতার হাতিয়ার রূপে উপস্থাপিত করেছেন মিশেল ফুকো (Michel Foucault : 1926-85)। সংক্ষেপে, তাঁর অন্যতম প্রধান বক্তব্য হল জ্ঞানচর্চা তথা ইতিহাসচর্চা ক্ষমতা বিস্তার এবং ক্ষমতা সংহতিকরণের হাতিয়ার রূপেই কাজ করেছিল। জ্ঞান ও সভ্যতা মানুুষকে তাঁর আদিম প্রকৃতি ও চরিত্র থেকে বিযুক্ত করে ক্রমশ বিকৃতির দিকে ঠেলে দেয়।

ক্ষমতার দিক থেকে, ক্ষমতাবানের দিক থেকে না দেখে ইতিহাসকে দেখা যাক নীরব রাত্রাজনের দিক থেকে, অবহেলিতা নারীর দিক থেকে, শোষিত নিম্নবর্গের দিক থেকে। দৃষ্টিভঙ্গি ও চর্চার কেন্দ্র পরিবর্তিত হওয়ার ফলে সম্প্রতি ইতিহাসে অনেক নতুন নতুন মাত্রা সংযোজিত হয়েছে।

স্বাভাবিকভাবেই মানুুষের একান্ত ব্যক্তিগত জীবনও ইতিহাসের আলোচনার বিষয় হয়ে উঠেছে। আমাদের ব্যক্তিগত ও পারিবারিক সম্পর্ক, আমাদের রন্ধনবিদ্যা, আমাদের সামাজিক আচার-ব্যবহার সবই আজ ইতিহাস-আলোচনার বিষয় হয়ে উঠেছে।

মানুুষের সচেতন মনের গভীরে যে অজানা, অদেখা জগত পড়ে আছে—যেখানে হয়তো গুঁড়ি মেরে বসে আছে অনেক অর্ধবিশ্বাস ও আদিমতা, সেখানেও আজ ঐতিহাসিক হাত বাড়িয়েছেন। শিক্ষা-দীক্ষায় প্রচণ্ড আধুনিক যুক্তিবাদীর মনের গোপনে নিহিত থাকতে পারে আদিম প্রবণতা ও প্রাচীন ঐতিহ্যের প্রতি আসক্তি। সেই চরিত্র হঠাৎ-ই কোনো সূক্ষ্মস্পর্শে অগুরূণিত হয়ে ওঠে। কবি-শিল্পী-সাহিত্যিকের বিচরণের জগত আজ ঐতিহাসিকেরও পদধ্বনিতে সর্বব।

এর সঙ্গেই প্রসঙ্গত জড়িয়ে আছে মনোভঙ্গির ইতিহাস ( History of mentalite )।

